

In memoriam
Prof. dr. Liman Rushiti
(1942-2024)



Më 29 shtator 2024, në moshën 82-vjeçare ka ndërruar jetë prof. dr. Liman Rushiti. Liman Rushiti u lind më 25 qershor 1942 në fshatin Sazli të komunës së Ferizajt. Shkollën fillore e kreu në vendlindje, ndërsa të mesmen në shkollën ekonomike “Faik Konica” në Ferizaj. Studimet i vazhdoi në Fakultetin Filozofik të Universitetit të Prishtinës, Dega e Historisë, të cilat i mbaroi më 18

shtator 1968. Në vitin 1975 mbrojti tezën e magjistraturës në Universitetin e Prishtinës me titull: *“Rregullimi administrativ dhe territorial i Kosovës 1918-1941”*. Në po të njëjtin Universitet mbrojti më 25 janar 1980 tezën e doktoratës me titull: *“Lëvizja Kaçake në Kosovë 1918-1928”*. Profesor doktor, Liman Rushiti, në vitin 1981, është avancuar në titullin e lartë shkencor profesor inordinar dhe në vitin 1987 është avancuar në titullin profesor ordinar.

Në marrëdhënie të rregullt pune në Institut ishte nga 1 dhjetori i vitit 1967, ku punoi derisa u pensionua në vitin 2007. Pra, për 40 vjet sa punoi në Institutin e Historisë ai kontribuoi në ndriçimin e ngjarjeve dhe personaliteteve të rëndësishme nga historia e popullit shqiptar, duke dhënë kontribut të çmueshëm në historiografinë shqiptare. Profesor Limani ishte pjesë e redaksive të ndryshme shkencore. Ka botuar pesë vepra të cilat janë:

1. *Lëvizja Kaçake në Kosovë (1918-1928)*, Prishtinë: Instituti i Historisë, 1981 dhe ribotuar me plotësime më 2016.
2. *Rrethanat politiko-shoqërore në Kosovë 1912-1918*, Prishtinë: Rilindja, 1986.
3. *Kujtime për Lëvizjen Kaçake*, Prishtinë, 2003.
4. *Ndarja territoriale dhe rregullimi administrativ i Kosovës 1878-1941*, Prishtinë: Instituti i Historisë, 2004.
5. *Dromca jete*, Prishtinë, 2023.

Duhet të theksohet fakti se prof. dr. Liman Rushiti ishte në redaksi të monografisë “Ferizaj”, e cila është në botim e sipër.

Krahas këtyre monografive, prof. dr. Liman Rushiti ishte edhe bashkautor i disa librave tjerë historikë e enciklopedikë si dhe i disa teksteve shkollore. Ndër veprat më të rëndësishme ku ishte bashkautor janë:

1. *Historia e popullit shqiptar III*, Tiranë: Akademia e Shkencave e Shqipërisë – Instituti i Historisë, 2007.
2. *Fjalori Enciklopedik i Kosovës I-II*, Prishtinë: Akademia e Shkencave dhe e Arteve e Kosovës, 2018.

Gjithashtu ishte pjesëmarrës në shumë kongrese dhe simpoziume të zhvilluara në qytetet shqiptare, si në Prishtinë, Tiranë, Shkup, Ferizaj, Vushtrri etj. dhe jashtë vendit në qytetet si në Beograd, Zagreb, Sarajevë etj. Është autor i mbi 200 punimeve shkencore nga fusha e historisë të botuara në revistat më të njohura shkencore në Kosovë, Shqipëri, Maqedoni të Veriut dhe vendet të tjera të rajonit. Disa nga punimet shkencore të prof. dr. Liman Rushitit të botuara në revistat shkencore të vendit janë: në revistën “Kosova” të botuar nga Instituti i Historisë, *Rregullimi administrativo-territorial i Kosovës gjatë viteve 1918-1929*, Kosova, Nr. 1, 1972, 243-260; *Problemet e Lëvizjes Kombëtare Shqiptare* në gazetën “Drita” të Sofjes, Nr. 3, Sofje: 1974, 241-260; *Vështrim i shkurtër i situatës politike në Kosovë (1912-1915)*, Kosova, Nr. 12, 1983, 177-194; *Gjendja ekonomike dhe politike në Kosovë gjatë Luftës së Parë Botërore*, Kosova, Nr.15, 1986, 87-106; *PKJ në Kosovë në zgjedhjet komunale për Konstituant të 28 nëntorit 1920*, Kosova, Nr. 16, 1987, 57-68; *Rezistenca e shqiptarëve ndaj politikës asimiluese e shfarosëse serbo-malazeze*, Kosova, Nr. 22/23, 2000/2001, 2003, 175-198; *Rezistenca e popullit shqiptar kundër pushtuesve serbo-malazezë 1912-1914*, Kosova, Nr. 24/25, 2002/2003, 2003, 161-170; pastaj në revistën “Vjetar” të botuar nga Agjencia Shtetërore e Arkivave të Kosovës, *Ndarja territoriale dhe rregullimi administrativ i Kosovës (1929-1941)*, Vjetar, Nr.12-13, 1976/1977, 1981, 43-76; *Dëbimi i shqiptarëve nga qarku i Prizrenit 1919-1922*, Vjetar, Nr. 27-28, 2002, 311-317; *Ibrahim Lutfiu*, Vjetar, Nr. 29-30, 2003, 367-378; *Komiteti Mbrojtja Kombëtare e Kosovës dhe Lëvizja Kaçake*, Vjetar, Nr. 39-40, 2008, 409-415 etj.

Profesori u nda nga jeta më 29 shtator 2024, në Prishtinë i rrethuar nga familjarët, ndërsa u varros më 2 tetor 2024 në vendlindjen e tij, në varrezat e fshatit Sazli të komunës së Ferizajt.

Skender LUTFIU